



省中稿卷四目錄

七言律詩

聞警寄柏泉督學

送程惟時赴福寧州

壽南溪隱者

寄壽王九之

送陳惟表赴滇南

送杭子判普安

送張鄢陵

四十初度自述

首夏偕四曹諸君過賜谷道院

省中憶弟妹

送范鈞州

辛丑冬日紀事二首

柳村卷贈席將軍 春日憶雨花臺

壽大中丞南渠翁 送陳敬夫守台州

夏日有懷江村園亭

送李子復官南曹

送劉達夫赴光州學正

送劉都督進表還南京

中秋諸子集余館席上次羽伯韻

謝王檢討贈劍 壽侗菴翁

母氏誕辰辱四曹諸君枉駕率爾開筵賦

詩奉謝 西麓草堂

送羽伯赴彰德 立春日過陽谷院

除夜答高汝州 寒食

徐母壽詩 省中老杏爛然吐花

對之有懷率爾成句

送兄 送徐叅軍赴遼東

送金錫之赴臨江 送徐子學南還

東園公壽詩 送黃進士君任推溫

州 送朱進士自克使蜀

送俞進士伯駿令政和

送丘進士鳴周令永嘉

寄鄭子質太守 叨轉出京馮子汝強

追送潞河贈詩次韻申謝

潞河道中有懷諸公奉寄一首

過宿遷訪蔡弘濟 維揚別張大叅省丈

渡江 還家口號

七言排律

送東橋尚書攷績還南京

五言絕句

題東橋翁所藏畫冊十幅

七言絕句

文太史壽詞八首 雪詩六首

徐州館中三首 聖母梓宮南下哀歌

月夕送林世端

和胡大夫邊行短歌六首

愛松卷 送陸子還松江

步虛詞五首 塞下曲

閨怨二首

送朱山人

初冬省中口號次湛泉子五首  
至維揚別丘俞二令

省中稿卷四目錄終

省中稿卷四

七言律詩

聞警寄柏泉督學

雲中飛檄上金閨傳道胡兒繞晉溪報主官慚  
大夫後懷人書阻孟門西清宵虛館臨奎壁白  
日中原急鼓聲想見文儒逢世難只將談笑戮  
鯨鯢

送程惟時赴福寧州

名家才子擅風流皂蓋彤幃作壯游戲策慚予

同計吏分符羨爾列諸侯還家画舫應隨鴈到  
郡黎民不佩牛指日政成書第一璽書先過九  
僊樓

壽南溪隱者

曾從弱水度溪南尚想瑯函日月含顧我久違  
蒼玉杖有誰時扣赤霞菴金堤瑤草冬仍發繡  
篋銀題老更探已識慶源開鳳穴佇看壽宇駐  
鸞駮

寄壽王九之

不讓陶潛能削迹還同蘧瑗早知非碧幢紅旒  
有何意白鷺青田甘息機瓊芝近報生僊館玉  
樹懸知映舞衣今日望鄉思獻壽一星南極正  
光輝

送陳惟表赴滇南

日邊送客游南粵立馬啣杯說土風攬轡獨行  
山瘴息褰帷羅拜野人同漢皇金碧留巘畔諸  
葛旌旗在眼中怨別不須驚萬里由來弧矢意  
無窮

送杭子判普安

殊方作吏君恩重且喜春雲送馬蹄問俗旌麾  
勞露冕望塵蕃部雜雕題僊巖時有丹砂結蠻  
洞晴看刺竹齊莫惜携家登絕徼皇風今過夜  
郎西

送張鄆陵

碧郊芳樹散春晴錦席離尊駐客旌洛下諸侯  
新佩印殿中三禮早知名彩輿到處棠花發翠  
節停邊麥穗生自古臺郎徵茂宰鳴珂看轉鳳

凰城

四十初度自述

薰風吹律轉炎方客子懸弧托帝鄉龍殿致身  
珠斗近鳳臺回首白雲長晨驅羸馬趨東省夕  
饌孤豚獻北堂四十無聞空忝竊敢云閑署老  
馮唐

首夏偕四曹諸君過賜谷道院

靈壇縹緲塵容淨別館芳菲霽景分松逕樓臺  
披霧入石林鍾鼓隔花聞浮杯曲水流銀漢映

幕僊葩落絳雲休沐暫忻陪雅躅留懽何惜罄  
餘燠

省中憶弟妹

粉署清華接鳳凰  
握蘭無事日初長  
堦花過雨娟娟淨  
院栢含風細細香  
盛世濫懸蒼玉珮  
故山真負碧羅裳  
春來弟妹牽離思  
况復音書滯一鄉

送范鈞州

青袍射策升青禁  
紫綬分符出紫宸  
迢遞雙旌

點飛絮參差五馬動  
輕塵海邊衣錦偏宜晝  
洛下停車併是春  
坐見璽書召良牧  
看君歸翼大明辰

辛丑冬日紀事二首

霜落秋高胡馬閑  
早時氛祲出雲間  
回中道路通諸夏  
老上旌旗繞故關  
北闕聖人勞拊髀  
南曹孤客欲摧顏  
恒山晉水天王地  
忍見年年牧馬還

萬年燕冀定神都  
本置三關控羯胡  
豈謂玉門



疎斥堠屢煩金殿降兵符見馳羽檄還來往聞  
縛酋王定有無獨使宵衣憂北伐諸公何以贊  
雄謨

柳村卷贈席將軍

江村山柳萬條青村裏將軍甲第成石岍午陰  
嘶赤馬旗門晴日轉倉庚有時開逕延三蓋共  
坐垂簾論五兵海內祗今思大樹莫令尊俎負  
平生

春日憶雨花臺

春日登臺瞰舊京漢家宮殿接雲平煙中樹色  
千門合日下江流一片明往往天花沾舞袖時  
時山鳥雜吹笙別來已隔長干路芳草猶牽萬  
里情

壽大中丞南渠翁

乞歸元荷 聖恩饒暫結僊人度石橋此際孤  
高齊五嶽向來勲業重三朝吟邊紫氣通瑤海  
夢裏丹心切絳霄今日鹽梅須舊德肯容黃髮  
老漁樵

送陳敬夫守台州

清朝登榜見才人，黑髮金章已在身。  
粉署握蘭同就日，赤城分虎獨行春。  
海霞垂綵明朱紱，僊鹿成行引畫輪。  
預識奏功當受寵，飄飄珠履上星辰。

夏日有懷江村園亭

聞道楊園敞翠亭，雜花千樹映疎藤。  
竹間彩石藏靈異，檻外清泉散鬱蒸。  
臥聽蛟龍吟玉澗，坐看風雨下鍾陵。  
黃塵束帶慙高誼，回首蒼松去

未能

送李子復官南曹

君有高才甘吏隱，南曹仍去遂初心。  
舊游獨訪春官侶，秀句重題大士林。  
賓館酒杯勞駐馬，天涯秋節悵分襟。  
鳳臺遙望無窮憶，蘿月幽期阻其尋。

送劉達夫赴光州學正

故人南去露華零，悵望秋風送酒甌。  
官似鄭虔重結綬，人如劉向舊傳經。  
城邊汝水穿池綠，天

外嵩山入座青繫馬堂階逢客少興來長味有  
誰聽

送劉都督進表還南京

雲門頌壽龍函入霜節懷鄉虎旆旋袖染御香  
辭北極臂懸京鑰向南天軍儲尚憶蕭何策儒  
將元推郤縠賢西望見愁戎馬逼可能無意勒  
燕然

中秋諸子集余館席上次羽伯韻

城上西風吹暝煙天邊華月照秋筵近人涼氣  
霏霏濕應節清光故故圓絕塞此時喧鼓角總  
戎何日選才賢啣杯幸接憂時客高論飄飄五  
夜偏

謝王檢討贈劍

帝京游宦再逢君臂上青萍解贈勤慷慨遂輕  
千戶值光芒遙動七星文北來戎馬年年急西  
去烽煙夜夜聞願拭鷄膏報知己白狼河外靜  
妖氛

壽侗菴翁

秦淮一道護僊家高棟層軒結紫霞蒼徑秀分  
千畝竹朱闌香吐四時花鷗邊下榻忘機事石  
上彈棋閱歲華聞道蒲輪徵欲近定求勾漏覓  
丹砂

母氏誕辰辱四曹諸君枉駕率爾開筵賦

詩奉謝

移家游宦近蓬萊堂背佳辰曲宴開正喜人間  
慈幄敞忽承天上錦韉來萱花朶朶迎恩帙蘭  
氣重重覆壽杯截髮駐車勞罔極彈冠依玉愧

非才

西麓草堂

聞君新卜水雲居高棟層軒結構殊雪後飛鳥  
時一止春來巢燕巧相呼案頭總集三山傳石  
上新栽九節蒲側想朱門開繡闥清虛能及此  
間無

送羽伯赴彰德

詞人健思峽同傾每得高篇比夜明日下正欣  
龍劍合雪中俄送錦韉行百壺繾綣臨燕市雙

旆飄搖指魏城聞道受禧方側席公車應召洛陽生

立春日過賜谷院

春朝結伴訪儒家駐馬丹臺玩物華金色未舒  
宮畔柳瓊枝全吐閣中花壇回淑氣香雲動徑  
轉條風羽旆斜乘興邀歡歸路晚鳳城高處集  
昏鴉

除夜答高汝州

移家游宦近明光惜歲頻添五夜香帝里風煙

將改曆慈幃燈火預迎祥倚樓苦憶青山遠攬  
鏡空驚白髮長冀北汝南均是客何時同問水  
雲鄉

寒食

長安宿雨淨浮塵萬井重逢禁火辰趙女秋千  
應自得燕人蹴鞠漫相親每懷西寺鶯聲細獨  
憶南江柳葉新微祿一沾歸未卜何時倍賞故  
山春

徐母壽詩

霜前慈幄錦筵開  
日下郎君捧檄回  
迢遞龍光生綵帔  
峻嶒松節映瑤臺  
金漿舊和長生藥  
海水新添獻壽杯  
想對棠花同舞處  
西池還有鹿車來

省中老杏爛然吐  
花對之有懷率爾成句  
文杏何年植省堂  
看花一倍惜年光  
雪殘芳盡驚遲發  
歲久高枝訝許長  
近日故應通御氣  
倚雲疑是學宮粧  
村邊沽酒饒千樹  
回首山川隔故鄉

送元

鴈行渺渺欣同集  
馬色蕭蕭悵獨還  
流水家邊心不擾  
浮雲天外意俱閑  
五千道德懸能契  
四十頭臚總未斑  
弟在東曹獨留滯  
棠花今去共誰攀

送徐參軍赴遼東

參軍足馬入遼陽  
羽戟森森滿路光  
雪後貂裘經渤海  
日邊珠劍倚扶桑  
胡塵北望稀狼火  
鄉信南歸有鴈行  
共道書生多膽氣  
談兵應爲靜

遐方

送金錫之赴臨江

鄉書名姓憶同題尚想談經臥石溪恩命再分  
長樂下僊帆重指豫章西望中江水臨官舍別  
路寒雲送馬蹄此去歌謠迎半刺風流應與古  
人齊

送徐子學南還

越南煮海有奇功日下軍儲遠自供潞渚暫停  
新綵鷁漢庭重拜舊蒼龍風塵會面驚三載兒

女牽衣喜萬重下榻一宵旋解袂啣杯應恨未  
從容

東園公壽詩

王孫名譽滿人寰門閤巍峩霄漢間坐上衣冠  
皆國士水邊樓榭即蓬山瑤林羣鳳將鳴世玉  
洞三花巧駐顏南望金堂思獻壽獨慚留滯紫  
宸班

送黃進士君任推溫州

漢廷結綬喜逢君獻藝曾披五色文新捧絲綸

欣佐牧共看鴛鴦惜離群筵開錦甸邀停旆名  
在龍樓望策勲此去郡堂知訟簡不妨頻眺鴈  
山雲

送朱進士自充使蜀

楚楚冠裳辭北極飄飄旌旆下西川尊前白壁  
慙知已江上黃花悵遠天行處星河三峽外夢  
中鴛鴦上雲邊所欣駟馬寧親地遙引天香入  
壽筵

送俞進士伯駿令政和

飄飄僊令佩雲裾新綰銅章出禁廬去想栽花  
應滿縣行看擲果定盈車寧親斑袖心先慰化  
俗朱紘思有餘鳳閣蘭臺看子入早時名在薦  
賢書

送丘進士鳴周令永嘉

青年分竹下天朝越水閩山路不遙百里早看  
新製錦雙旌先過舊題橋尊開朔野飄霜葉舟  
度寒江急暮潮獻納祗今求茂宰佇看搖珮上  
青霄



寄鄭子質太守

堯天尺五昔同瞻尚想揮毫策孝廉豈有明珠  
歸馬援不妨垂柳臥陶潛頻收靈藥栽花徑旋  
插疎籬護竹簷銷盡機心無一寸寄言鷗鳥莫  
相嫌

叨轉出京馮子汝強追送潞河贈詩次韻

申謝

江左投交二十年文成倚馬有誰先著書久臥  
齊山下仗劍常逢易水邊秋晚送歸勞驛騎月

明呼酒上樓船雲霄事業非遲暮爲喜昂藏兩  
鬢玄

潞河道中有懷諸子奉寄一首

長河南下客程遙北望燕山翠不消散吏衣冠  
今故國美人簪珮總丹霄風前驛樹枝搖落天  
外江鴻影寂寥何日金門還曳履雲中重聽舜  
簫韶

過宿遷訪蔡弘濟

早携書劍接中郎草閣猶懸白雪章千里衣冠

頻入夢百年雞黍復登堂久拋黃綬輸真樂何  
補清朝愧獨忙下榻便須尊共倒歸途無柰棹  
相將

維揚別張大叅省丈

久陪簪笏侍天門畫省同心笑語溫倚玉自知  
難並美橫金何幸續承恩隆冬邂逅青油舫長  
夜留連白獸樽莫嘆宦游分兩地輸忠均是答  
乾坤

渡江

謬承新命下金鑿忽漫還鄉歲已闌綵服近家  
占鵲喜青山隔水見龍盤風收宿雨江光淨日  
射高原樹影寒今日親闈瞻帝闕寸心遙對北  
辰看

還家口號

謬持銓簿近明光叨拜閒官得故鄉入舍喜攀  
庭樹綠逢人爭訝鬢毛蒼煙霞有意嘲逋客俎  
豆無聞媿奉常笑對慈顏傾壽斝緋衣猶帶漢  
宮香

七言排律

城西審祠送東橋司寇公考績還留京

報政南歸別九天君王錫宴渥恩偏離宮舊愛  
相如賦留省今推定國賢戀闕口陳經國計出  
京衣帶御爐煙三朝耆舊人爭覩五色文章世  
共傳冠冕同鄉攀道駕鶯花三月送樓船輝煌  
台斗尊壘上磊落珠璣咳唾前自昔人倫瞻領  
袖即今寰夏望陶甄陪都未許停僊駕曳履行  
看捧御筵

五言絕句

題東橋翁所藏畫冊十首翁考績入京携  
所藏畫冊命舊游諸子分題穀得十幅

因各賦短句

牛山小景

天印平如削牛頭屹相峙拄杖畫看雲無人自  
來去

青溪小景

別業青溪曲芳春翠靄濃天空垂斗漢地濶起

蛟龍

小鳥

琪樹非凡樹文禽異俗禽終飛千仞上暫息一枝陰

草蟲

靜院無人至香蘭遶徑生秋風吹節序兩兩草蟲鳴

水僊

只如僊女降還傍水中行羅鞵凌波淺冰肌映

月清

杏花

二月春風動江南百卉香千枝散雲錦不讓午橋庄

朱櫻

首夏朱櫻熟風前也自紅寢園春薦後處處鳥銜同

山茶

鶴頂枝枝見丹霞朶朶裁不隨春共吐故與雪

爭開

虞美人

一種嬋娟色迎風舞力微直須將豔質繡入美人衣

蘭花

芳蘭散初馥幽意一何深側想浮湘日應懷吊屈心

七言絕句

文太史壽詞八首

早向衡山別紫霞却來吳苑駐僊車世人盡愛朱丹轂道士唯食松柏花

花外晴池下鳳凰退朝曾坐集賢堂銀罌翠釜分光祿玉版雲毫給上方

玉案橫披相鶴經蓮華迴映髻絲青共傳万朔非凡骨更道嚴光是客星

清宵列宿護丹丘白日靈旗過石樓請看天門待金馬何如函谷訪青牛

瑯臺翠壁俯雲城畫采瑤花結伴行藜杖直疑

周內史綃衣還似董雙成  
地轉長洲爲弱水天開胥嶺作蓬山  
磬房麋鹿千年白雲館靈芝五色斑  
何謝張顛呼草聖直如李白作詩豪  
承恩解奪宮衣出到處能令紙價高  
河上丈人開壽觴瑤樓石閣舞霓裳  
金臺小吏無由聽半夜遙瞻斗極光

雪詩六首

靉靄彤雲接海涯  
霏微靈雪舞山家  
欲呈來歲

千箱瑞故放茲晨  
六出花

洒迥已看埋翠律  
沾梅更覺助芳菲  
未同空裏鹽頻撒  
直似風前絮迸飛

邸第朱門十二重  
雪山多出玉芙蓉  
清輝遙映珍珠箔  
朔氣全消琥珀鐘

銀霰平鋪百子池  
瑤花競吐萬年枝  
宸章定有南薰調  
不比周王黃竹詩

瑤樹光搖七寶粧  
銀花色映九龍牀  
掌上遙看迴雪舞  
珮中還有碎寒香

王母瑤池海上開鹿車鶴駕出蓬萊  
冰花不作人間白絳雪翻從六月來

徐州館中三首

匡牀湘簟客堂幽千里携家此滯留  
冀北遙瞻天帝府江南空憶瓦官樓

節臨三伏氣全收白日行空金不流  
轉愛殊方勝吾土直將朱夏當清秋

冀北江南形並峙襟喉都會此中間  
百道軍儲憑舴艋萬年天險托河山

聖母梓宮南下哀歌

金井親勞萬乘過玄宮元傍九龍坡  
楚江此夜魚龍泣水國真傳薤露歌

素舸高懸五鳳旌聖慈遙向九霄行  
金棺玉槨尋常事不盡天王罔極情

月夕送林世端

寶月當空子夜分西風鳴鴈不堪聞  
他鄉去住均爲客惟有清光可贈君

和胡大夫邊行短歌

玉關白草冷淒淒半夜旄頭照海西狼火一宵  
通大谷羽書三日過渠黎

仲冬西望虜塵飛聞道河東已被圍回紇即今  
饒戰畧將軍切莫損皇威

錢馬青旂掣海雲陣前誰建朔方勲天子早虛  
麟閣待不妨重画霍將軍

懸車束馬金城險疊鼓鳴笳紫塞深皇運擬兼  
三代曆胡兒須貢萬年琛

細數臨邊諸將帥輕生搗穴有何誰去年一戰

飛狐北今日猶聞颯颯悲

鵲印鸞書出殿中大夫新命獨登崇天邊喜觀  
平胡策塞上先傳破虜風

愛松卷

徂徠僂客下江東愛種菁葱偃蓋松密葉千重  
棲瑞鶴長鱗十丈臥蟠龍

送陸子還松江

江上題詩木葉黃送君歸臥水雲鄉即看海日  
朝揚彩更覩驪珠夜吐光



步虛詞五首

僊壇高結五雲深十二樓臺接禁林玉磬不知  
何處起天邊鶴駕一齊臨

芝蓋翩翩紫館晴空中香霧百神迎金書盡是  
長生籙寶炬還同不夜城

西來靈鶴自金方玉翮紛從寶殿翔一道祥煙  
通閭闔遙看絳節禮天皇

丹室叢霄瑞氣生霞衣遙引上公行寰中見闡  
三清界山下聞呼萬歲聲

鸞鳴縹緲雜簫鳴紫禁齋心徹紫京天爲萬方  
增聖壽不須僊藥自身輕

塞下曲

十月陰山千里雪層冰百丈壘爲丘將軍剽走  
飛黃馬夜半梟來克汗頭

閨怨二首

紛紛鐵騎遶陰山久佐嫖姚未許還圖像雲臺  
成底事不如生度玉門關

塞外長風萬里沙男兒橫劍久辭家朱顏暗逐

春光老怕見雙開蛺蝶花

送朱山人

野客乘舟冀北來  
逡巡還傍斗南回  
告余天上形龍闕  
不換江邊白石臺

初冬省中口號次湛泉子韻  
湛泉高士偶有新作因走筆和之發笑

玄冬改令茲晨覺無數  
寒雲挂林薄空堂日落  
吏人稀松下翩翩舞雙鶴

北風吹寒寒陡作  
趨朝五夜狐裘薄  
回頭却憶故山雲  
松巖日煖飛群鶴

與君終日談丘壑  
浮生轉覺功名薄  
試問天門謁九龍  
何如石洞調孤鶴

薄祿承顏差足樂  
若論濟世才真薄  
一枝倘可臥鷓鴣  
任渠纏貫仍騎鶴

獨爰仙夫偏解脫  
白日吹笙振叢薄  
緱嶺秋風別世人  
翛然獨跨雲中鶴

維揚舟中別丘俞二令

米霜同客見平生  
岐路分襟各愴情  
一曲勞歌

杯更進楚天明月滿蕪城

省中稿卷四

二十二

省中稿卷四終



